

# Bon Natal!

Bon Natal ü tütt ol néss päis  
E specialmènt a i abonati dro « Biaschés »,  
À qui co ch pias dä matt  
E qui ch'al trova mighia béll.

Bon Natal e bon ann  
Al sindich dro comün.  
Sto bott agh concedom  
Do botegli dä sciampagna  
E m panaton gréss mè na montagna.

Bon Natal ü tücc i autorità  
Comunai, patriziai e religios  
Che par noi i è sempö in gran da faa.

Bon Natal ai pouri donn  
Che vo piü sta la dro lävändig  
E dro fornell sèra ü mätagn.

Pouri oman! Se tücc i pènsa insci  
A ve l disi propi mi,  
Ädio per sempö tort e pitenzign.

Bon Natal ai mäestri  
Che ga mai üm di t vacanza  
E ä qui pouri märdäscett  
Che divantarà gobign gobett  
Perchiè a naa a scola a pè  
I a mo t sävèe cos l'è.

Auguri ä tücc qui mamm  
Che straveda per sei fiei  
Nässüi in dra lovata  
Trop tés e tüsürèi.

Bon Natal ä qui dri rivendicazioi.  
Si rüva a vegh üm risultat  
A ga n sarà anchia pei krümiri  
Do o tre bel branchiat.

Auguri ai moviment dri feminista  
Qui che scombatt per i problemi seri  
Senza compars e senza vitüperi.

Bon Natal ä qui che rid  
E bon Natal ä qui ca piansc.  
Ai prim ä gh näréssa dagan  
E a i altri ä gh näréssa tégan.

Bon Natal ä qui ca loura senza märizia  
E qui ca gota drä fädighia  
Me l toligh drä Letizia.

Bon Natal a i albergator  
Chi tramora me nä féia d'ärberell  
E vidèe in pericol sé lavor  
Fign chi pensa a r'autostrada.



A qui dr'ospadaa e dro gerontocomio  
Auguri dä mighia lassas naa  
Perchiè piü o mèno a gh'am bè tücc  
Na quai rognä dä grataa.

A i noss bell e bravi sociatä  
I continui a fass onor  
Cor rüsbäa scia sciüairat dä madai d'or.

A r « Ente türistisch » co s fa in mitä  
Par portaa Biaschia al rango dä citä  
Compliment e auguri in quantitä.

Dri bagai a n sa sgià parlò assèi  
Chi tegni domè ra bona strada,  
Chi cressi onest e savi  
Si vo vegh nä vita rispataa.

Bon Natal anchia ai dottor.  
L'è propi colpa soa, pouri mostri,  
Se m quai vegèt dä novant'agn  
O vo naa a trovaa sé creator.

Bon Natal ai tombolatt  
Che gh soridi ra fortuna.  
E se gh prèm ol « tocco magico »  
I giughi tücc da matt.

E che vegni finalment ra pas desiderada  
A portaa gioia e bondanza  
Per rä sgent amaregiada  
Ch'a pardü ogni sparanza.